

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১৩/২০১৭-১৮

ঢাকা, মঙ্গলবার ১৮ জুলাই ২০১৭, ৩ শ্রাবণ ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। অনুমতি ছাড়া অঙ্গ-প্রত্যঙ্গ সংযোজন করা যাবে না : মন্ত্রিসভায় আইনের খসড়া অনুমোদন
- ২। শিক্ষার মান নিশ্চিতকরণে পদক্ষেপ নিতে হবে : বিশ্ববিদ্যালয়গুলোকে রাষ্ট্রপতি
- ৩। আগামী জাতীয় সংসদ নির্বাচন নিয়ে মন্ত্রীদের সতর্কভাবে কথা বলার পরামর্শ প্রধানমন্ত্রীর
- ৪। এসডিজি অর্জনে তৃণমূলকে সম্পৃক্ত করতে হবে : স্পিকার
- ৫। বন্যাদুর্গত এলাকার একজন মানুষও না খেয়ে থাকবে না: ত্রাণমন্ত্রী
- ৬। কৃষকদের কাছ থেকে এক হাজার কোটি টাকার পাট কিনবে সরকার
- ৭। ঝুঁকিপূর্ণ শিশুশ্রম নিয়ে জরিপ হচ্ছে : শ্রম প্রতিমন্ত্রী
- ৮। পরিকল্পিত পরিবার গঠনে সহযোগিতা দিতে অগ্রসর জনগোষ্ঠীর প্রতি স্বাস্থ্যমন্ত্রীর আহ্বান
- ৯। অবকাঠামো শক্তিশালী হলে জেডার বৈষম্য কমবে : এডিবি'র প্রতিবেদন
- ১০। জাতীয় মৎস্য সপ্তাহ শুরু আজ

১। **অনুমতি ছাড়া অঙ্গ-প্রত্যঙ্গ সংযোজন করা যাবে না : মন্ত্রিসভায় আইনের খসড়া অনুমোদন**

কোনো হাসপাতাল সরকারের অনুমতি ছাড়া মানবদেহে অঙ্গ-প্রত্যঙ্গ সংযোজন করতে পারবে না। তবে সরকারি হাসপাতালে যেখানে বিশেষায়িত ইউনিট আছে সেখানে এ ধরনের অনুমতির প্রয়োজন নেই এমন বিধান রেখে ‘মানবদেহের অঙ্গ-প্রত্যঙ্গ সংযোজন (সংশোধন) আইন, ২০১৭’ এর খসড়া চূড়ান্ত অনুমোদন দিয়েছে মন্ত্রিসভা। এতে অঙ্গ-প্রত্যঙ্গ সংযোজনে নিকটাত্মীয়ের পরিধিও বাড়ানো হয়েছে। প্রধানমন্ত্রী শেখ হাসিনার সভাপতিত্বে গতকাল ১৭ জুলাই সোমবার সচিবালয়ে অনুষ্ঠিত মন্ত্রিসভার নিয়মিত বৈঠকে এ অনুমোদন দেওয়া হয়। সূত্র-সংবাদ (শেষ পৃ.,ক.৪), ইত্তেফাক (পৃ.১৯,ক.১), ইন্ডিপেনডেন্ট (পৃ.১,ক.৮), ডেইলি সান (পৃ.১,ক.৮)।

২। **শিক্ষার মান নিশ্চিতকরণে পদক্ষেপ নিতে হবে : বিশ্ববিদ্যালয়গুলোকে রাষ্ট্রপতি**

রাষ্ট্রপতি মো. আবদুল হামিদ শিক্ষার মান নিশ্চিতকরণে প্রয়োজনীয় পদক্ষেপ নিতে বিশ্ববিদ্যালয়গুলোর প্রতি আহ্বান জানিয়েছেন। বাংলাদেশ ইউনিভার্সিটি অভ প্রফেশনালসের (বিইউপি) উপাচার্য মেজর জেনারেল সালাহউদ্দিন মিয়াজী গতকাল ১৭ জুলাই সোমবার বঙ্গভবনে রাষ্ট্রপতির সঙ্গে সৌজন্য সাক্ষাৎ করতে গেলে তিনি বলেন, উচ্চ শিক্ষার মান নিশ্চিত করণ, যাতে ছাত্রছাত্রীরা বৈশ্বিক প্রতিযোগিতার সুযোগ নিতে পারে। সূত্র- সমকাল (পৃ.৫,ক.১), জনকণ্ঠ (পৃ.১,ক.৮), ইন্ডিপেনডেন্ট (পৃ.৩,ক.৫), ডেইলি সান (পৃ.২,ক.২)।

৩। **আগামী জাতীয় সংসদ নির্বাচন নিয়ে মন্ত্রীদের সতর্কভাবে কথা বলার পরামর্শ প্রধানমন্ত্রীর**

আগামী জাতীয় সংসদ নির্বাচন নিয়ে নানামুখী ষড়যন্ত্র হতে পারে বলে আশঙ্কা প্রকাশ করেছেন প্রধানমন্ত্রী শেখ হাসিনা। তিনি নির্বাচন কমিশন (ইসি) ঘোষিত রোডম্যাপ নিয়ে মন্তব্য না করতে এবং আগামী নির্বাচন নিয়ে সতর্কভাবে কথা বলার জন্য মন্ত্রীদের পরামর্শ দিয়েছেন। পাশাপাশি আগামী নির্বাচনে বিএনপির সেনা মোতায়েনের দাবিরও সমালোচনা করেন প্রধানমন্ত্রী। সচিবালয়ে গতকাল ১৭ জুলাই সোমবার অনুষ্ঠিত মন্ত্রিসভার নিয়মিত বৈঠকে অনির্ধারিত আলোচনায় এসব কথা বলেন প্রধানমন্ত্রী শেখ হাসিনা। সূত্র-যুগান্তর (পৃ.১,ক.৮), সংবাদ (শেষ পৃ.,ক.১), ইন্ডিপেনডেন্ট (পৃ.১,ক.২), এশিয়ান এজ (পৃ.১,ক.১)।

৪। **এসডিজি অর্জনে তৃণমূলকে সম্পৃক্ত করতে হবে : স্পিকার**

জাতীয় সংসদের স্পিকার ড. শিরীন শারমিন চৌধুরী বলেছেন, টেকসই উন্নয়ন লক্ষ্যমাত্রা (এসডিজি) অর্জন করতে হলে তৃণমূলের জনগণকে ব্যাপকভাবে সম্পৃক্ত করতে হবে। এ কাজে সংসদ সদস্যসহ জনপ্রতিনিধিদের যথাযথ ভূমিকা পালন করতে হবে। গতকাল ১৭ জুলাই সোমবার জাতীয় সংসদ ভবনের শপথ কক্ষে ‘বাংলাদেশ জাতীয় সংসদ ও ইউএনএফপিএ’ এর যৌথ উদ্যোগে আয়োজিত ‘জনসংখ্যা ও উন্নয়ন বিষয়ে সংসদের সক্ষমতা বৃদ্ধি (এসপিসিপিডি)’ শীর্ষক প্রকল্পের উদ্বোধন অনুষ্ঠানে প্রধান অতিথির বক্তব্যে তিনি এসব কথা বলেন। সূত্র-সংবাদ (শেষ পৃ.,ক.৬), জনকণ্ঠ (পৃ.১,ক.৪), ডেইলি সান (পৃ.২,ক.২)।

৫। **বন্যাদুর্গত এলাকার একজন মানুষও না খেয়ে থাকবে না: ত্রাণমন্ত্রী**

দুর্যোগ ব্যবস্থাপনা ও ত্রাণমন্ত্রী মোফাজ্জল হোসেন চৌধুরী মায়া বলেছেন, এ সরকারের সময়ে বন্যাদুর্গত এলাকার একজন মানুষও না খেয়ে থাকবে না, বন্যা মোকাবিলায় সব রকম প্রস্তুতি রয়েছে। বন্যায় ক্ষতিগ্রস্ত ও নদী ভাঙনের শিকার প্রত্যেকটি পরিবারকে পুনর্বাসিত করা হবে। তিনি হুঁশিয়ারি উচ্চারণ করে বলেন, ত্রাণ নিয়ে কোনো অনিয়ম সহ্য করা হবে না, কাউকে ছাড় দেওয়া হবে না। গতকাল ১৭ জুলাই সোমবার কুড়িগ্রামের উলিপুর উপজেলার চাঁদনী বজরা সরকারি প্রাথমিক বিদ্যালয় মাঠে ১২শ বন্যার্ত মানুষের মাঝে ত্রাণ বিতরণকালে তিনি এসব কথা বলেন। সূত্র-ইত্তেফাক (পৃ.১৫,ক.৪), ভোরের কাগজ (শেষ পৃ.,ক.১), বাংলাদেশ টুডে (পৃ.৩,ক.৫)।

৬। **কৃষকদের কাছ থেকে এক হাজার কোটি টাকার পাট কিনবে সরকার**

শুরু হয়েছে পাট কাটার মৌসুম। আর মৌসুমের শুরুতেই পাট কিনতে মাঠে নেমেছে রাষ্ট্রায়ত্ত্ব পাটকলগুলোর

পরিচালনাকারী সংস্থা বাংলাদেশ পাটকল করপোরেশন (বিজেএমসি)। কৃষক যাতে পাটের ন্যায্যমূল্য পায় সেজন্য আগেভাগেই পাট কেনা শুরু করেছে সরকারের এ সংস্থাটি। চলতি মৌসুমে এক হাজার কোটি টাকার পাট কিনবে বিজেএমসি। ইতোমধ্যে সরকার ২০০ কোটি টাকা পাট কেনার জন্য বরাদ্দ দিয়েছে। এছাড়া মিলগুলো ও বিজেএমসি গতবারের মতো এবারো প্রায় ৬০০ কোটি টাকা জোগান দেবে। বাকি টাকা সরকারের কাছ থেকে নেওয়া হবে। ১৭শ' ৫০ টাকা থেকে ১৮'শ টাকা দরে মোট ২২ লাখ কুইন্টাল পাট কেনা হবে। সূত্র-ইত্তেফাক (পৃ.২,ক.২)।

৭। ঝুঁকিপূর্ণ শিশুশ্রম নিয়ে জরিপ হচ্ছে : শ্রম প্রতিমন্ত্রী

শ্রম ও কর্মসংস্থান প্রতিমন্ত্রী মো. মুজিবুল হক বলেছেন, ঝুঁকিপূর্ণ শিশুশ্রমের কারণ বের করতে সরকার দেশব্যাপী একটি জরিপ করছে। এতে দেশে কী পরিমাণ শিশু ঝুঁকিপূর্ণ কাজে নিয়োজিত রয়েছে, তা বের করা হবে। এরপর এটাকে সামনে রেখে কর্মপরিকল্পনা নেওয়া হবে। গতকাল ১৭ জুলাই সোমবার রাজধানীর ডেইলি স্টার ভবনে 'টেকসই উন্নয়ন লক্ষ্যমাত্রার আলোকে ঝুঁকিপূর্ণ শিশুশ্রম নিরসন এবং করণীয়' শীর্ষক এক গোলটেবিল বৈঠকে এ কথা জানান শ্রম প্রতিমন্ত্রী মো. মুজিবুল হক। সূত্র-প্রথম আলো (পৃ.৯,ক.১), নিউ এজ (পৃ.৪,ক.২)।

৮। পরিকল্পিত পরিবার গঠনে সহযোগিতা দিতে অগ্রসর জনগোষ্ঠীর প্রতি স্বাস্থ্যমন্ত্রীর আহ্বান

স্বাস্থ্য ও পরিবার কল্যাণমন্ত্রী মোহাম্মদ নাসিম বলেছেন, পরিকল্পিত পরিবার গঠনে মানুষকে উদ্বুদ্ধ করতে শুধু শহরকেন্দ্রিক না থেকে প্রত্যন্ত, দুর্গম, বস্তি ও শ্রমিক অধ্যুষিত এলাকায় সচেতনতা কার্যক্রম জোরদার করতে হবে। এক্ষেত্রে সহযোগিতার হাত বাড়াতে রাজনৈতিক, ধর্মীয় নেতৃবৃন্দ এবং গণমাধ্যম ও সাংস্কৃতিক ব্যক্তিত্বসহ সর্বস্তরের অগ্রসর জনগোষ্ঠীর প্রতি আহ্বান জানান তিনি। গতকাল ১৭ জুলাই সোমবার ঢাকার একটি জাতীয় দৈনিকের কার্যালয়ে 'পরিবার পরিকল্পনা : জনগণের ক্ষমতায়ন, জাতীয় উন্নয়ন' শীর্ষক গোল টেবিল বৈঠকে প্রধান অতিথির বক্তৃতায় তিনি একথা বলেন। সূত্র-জনকণ্ঠ (শেষ পৃ.,ক.৩)।

৯। অবকাঠামো শক্তিশালী হলে জেভার বৈষম্য কমবে : এডিবি'র প্রতিবেদন

বাংলাদেশের নারীদের অর্থনৈতিকভাবে ক্ষমতা বাড়াতে অবকাঠামো শক্তিশালী করতে হবে। অবকাঠামো উন্নত হলে দেশের জেভার বৈষম্য কমবে বলে অভিমত প্রকাশ করা হয়েছে এশীয় উন্নয়ন ব্যাংকের (এডিবি) স্বাধীন মূল্যায়ন বিভাগের 'জেভার সহায়তা ও দেশের উন্নয়ন' বিষয়ক এক প্রতিবেদনে। গতকাল ১৭ জুলাই সোমবার রাজধানীর একটি হোটেলে এ প্রতিবেদন তুলে ধরেন এডিবি'র স্বাধীন মূল্যায়ন বিভাগের মুখ্য মূল্যায়ন বিশেষজ্ঞ হিঅন এইচ সন। সূত্র-ইত্তেফাক (পৃ.১৮,ক.৬), ইনকিলাব (শেষ পৃ.,ক.২), নিউজ টুডে (পৃ.৩,ক.১), ডেইলি স্টার (পৃ.৫,ক.১)।

১০। জাতীয় মৎস্য সপ্তাহ শুরু আজ

'মাছচাষে গড়বো দেশ, বদলে দেব বাংলাদেশ' এই প্রতিপাদ্য নিয়ে আজ থেকে সপ্তাহব্যাপী শুরু হচ্ছে জাতীয় মৎস্য সপ্তাহ-২০১৭। এ উপলক্ষে জাতীয় ও জেলা পর্যায়ে ব্যাপক কর্মসূচি গ্রহণ করা হয়েছে। এছাড়া দিবসটি উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। সূত্র-সংবাদ (শেষ পৃ.,ক.৩), সমকাল (পৃ.৫,ক.৫), অবজারভার (পৃ.৩,ক.৬), নিউজ টুডে (পৃ.৩,ক.৬)।

সম্পাদকীয়

ক. ইত্তেফাক : শিক্ষা মন্ত্রণালয়ের আওতাধীন পরিদর্শন ও নিরীক্ষা অধিদপ্তর (ডিআইএ) সারাদেশের প্রায় ৩৬ সহস্রাধিক এমপিওভুক্ত প্রতিষ্ঠানে আর্থিক অনিয়মের তদন্ত করতে গিয়ে অসংখ্য জাল

সনদধারী শিক্ষক-কর্মচারীর সন্ধান পাওয়ার খবরে উদ্বেগ প্রকাশ করে জাল সনদধারীদের চিহ্নিত করে বিচার দাবি।

- খ. **প্রথম আলো** : ফরিদপুর জেনারেল হাসপাতালের দুটি অ্যাম্বুলেন্স জ্বালানি তেলের অভাবে ১৭ দিন বন্ধ থাকার খবর উল্লেখ করে সারাদেশে বেশিরভাগ সরকারি হাসপাতালে এ ধরনের চিত্র দেখা যাওয়ায় এ ব্যাপারে কার্যকর উদ্যোগ নেওয়ার সুপারিশ।
- গ. **সমকাল** : বেসরকারি উদ্যোগে গড়ে ওঠা মাদ্রাসার সঙ্গে যুক্ত ‘ক্যাডেট’ ও ‘ইন্টারন্যাশনাল’ শব্দ বাদ দিতে কারিগরি ও মাদ্রাসা শিক্ষা বিভাগ নির্দেশ জারি করায় তা যুক্তিসংগত বলে মত প্রকাশ।
- ঘ. **যায়যায়দিন** : কৃষিপণ্য রপ্তানিতে আয় বাড়াতে যথাযথ পদক্ষেপ নেওয়া হবে বলে প্রত্যাশা ব্যক্ত।
- ঙ. **ইন্ডিপেন্ডেন্ট, নিউ এজ** : মাতৃমৃত্যুর হার কমানোর ক্ষেত্রে বাংলাদেশ ব্যাপক উন্নতি লাভ করায় আরও সাফল্যের জন্য সরকারের পাশাপাশি এনজিওসমূহকেও এ ব্যাপারে এগিয়ে আসার আহ্বান।
- চ. **ডেইলি সান, নিউ এজ, সংবাদ, সমকাল, যুগান্তর, ইনকিলাব, যায়যায়দিন** : নির্বাচনী রোডম্যাপ ঘোষিত হওয়ায় জাতীয় নির্বাচন সুষ্ঠু ও নিরপেক্ষভাবে সম্পন্ন করতে নির্বাচন কমিশনকে সব দলের জন্য লেভেল প্লেয়িং ফিল্ড তৈরি করতে সর্বোত্তম প্রচেষ্টা চালানোর সুপারিশ।
- ছ. **ডেইলি স্টার, নিউ নেশন, সংবাদ** : গণসেবা গ্রহণ করতে গিয়ে পাবলিক প্লেসে নারীদের নিরাপত্তা নিয়ে এ্যাকশন এইডের গবেষণার ফলাফল তুলে ধরে কর্মক্ষেত্র, মার্কেট, বাসস্টপ, হাসপাতাল ও পুলিশ স্টেশনের মতো পাবলিক প্লেসে নারীদের নিরাপত্তা নিশ্চিতকরণে সরকারি-বেসরকারি সংস্থাসমূহকে এগিয়ে আসার সুপারিশ।
- জ. **নিউ টুডে** : রেমিট্যান্স প্রবাহ কমে যাওয়ায় টেকনিক্যাল ট্রেনিংয়ের দ্বারা দক্ষ জনসম্পদ গড়ে তোলার ওপর গুরুত্বারোপ।
- ঝ. **অবজারভার** : রাজধানীবাসীকে চিকুনগুনিয়া ও জলাবদ্ধতার হাত থেকে নিষ্কৃতি দিতে সম্প্রতি ঢাকার দুই মেয়রের গৃহীত কর্মপ্রচেষ্টার সাফল্যের প্রত্যাশা।
- ঞ. **ফিনানশিয়াল এক্সপ্রেস** : গুলিস্তান-যাত্রাবাড়ীর মেয়র মো. হানিফ ফ্লাইওভারের টোলের হার নিয়ে প্রাইভেট অপারেটরদের খামখেয়ালি সিদ্ধান্তে স্বল্প দূরত্বের যানচলাচলে অনীহা তৈরি হওয়ায় টোল আদায়ে যথাযথ পদক্ষেপ নেওয়ার প্রত্যাশা।

উপ-সম্পাদকীয়

ভোরের কাগজ পত্রিকায় প্রকাশিত কলামে উল্লেখ করা হয়েছে রাজনীতিবিদ ও বুদ্ধিজীবীর দুর্নীতিমুক্ত ও সংস্কৃতিমনা থাকার চেষ্টা করলে সমাজও দুর্নীতিমুক্ত ও সংস্কৃতিমনা হবে।

নিবন্ধ ও ফিচার

সংবাদ পত্রিকায় প্রকাশিত ‘মানসিক স্বাস্থ্য ঠিক রাখতে হবে’ শিরোনামের নিবন্ধে অভিমত প্রকাশ করা হয়েছে, শারীরিক স্বাস্থ্যের মতো মানসিক স্বাস্থ্যের সুস্থতার ব্যাপারেও সচেতন থাকতে হবে।

#

ডালিয়া/ফাহিমা/শুকলা/মরজিনা/সাদ্দা/রশীদ/তানিয়া/২০১৭/৯.০০ঘন্টা